

和 𩇛 𩇛 𩇛 𩇛 𩇛

吹萬樓文集卷十六

金山高 變吹萬

遊黃山日記

黃山爲中國境內有數之名山處於皖之徽甯二郡間東南屬歙西南屬休甯東北屬甯國太平初名黟山唐天寶時敕改今名昔者黃帝問道於容成子獲靈丹於浮邱公曰鍊成金丹必假山秀水正之地其藥乃靈惟黟山據得其中雲凝碧漢氣冠羣山神仙止焉靈泉香美清溫冬夏不變沐浴其中萬病皆愈黃帝遂命駕與容成子浮邱公同游此山得道上昇今此山有泉其沸如湯常湧丹砂周書稱黃帝服還丹

浸湯泉七日見白龍珠履瓊漿自天而降卽此泉也郡國志
浙江天目山高一萬八千丈僅及黃山之麓山有摩天戛日
之勢浙東西宣歙池饒信等郡之山皆屬此山支脈則山高
可知宋人謂黃山周圍幾五六百里雄視大都與廬嶽稱三
天子鄣九華得三之一巫峽得四之一則山之大可知乃超
然特起不列於五嶽之內雖自開闢以來卽有此山而自唐
以後始有題詠然以巖嶺過峻遊蹤所及代不數人而造極
登峰尤屬寥寥無幾以徐霞客之遊歷境內名山而於此山
亦歎爲閎博富麗則山之奇可知也余慕之久矣卒卒未能
遂遊願吾友吳江金君松岑今之徐霞客也將往遊焉來書

招爲偕行余欣然諾遂於辛酉四月初五日首途時久雨初晴意殊暢適坐小船於上午八時解纜至下午四時抵松江於夜間八時半乘火車至十二時抵杭州住宿城站旅館

初六日晴陰晨起餐後卽走詢松岑於裏橫河橋張君馨叔家蓋松岑亦於昨晚由蘇到杭與余有成約也詢後悉其寓湖濱旅館余亦移寓晤之遂定明日行同遊者尙有其邑人唐君耕餘並約歙人宋君景澂爲之導是日午刻徐君眉軒招飲於青年會得晤王丹揆陶拙存兩先生同座者又有袁則先張馨叔陳廉齋陳虞生及松岑諸君席散回至湖上攝一影獨走湖濱公園相對湖山不覺日暮遂至清泰第二旅

館與眉軒談少頃同至西悅來赴陳廉齋招飲

初七日晴上午十一時偕松岑耕餘景澂及袁則先張馨叔同坐人力車別西湖諸山而至七賢街雇划船至餘杭因袁張二君爲考察水利亦須往餘杭也松岑更攜從者名王錫光同行經倉前鎮午饌復行共四十五里而抵餘杭至大通旅館住焉餘杭街市尙熱鬧而旅館殊不清潔是夜與松岑馨叔造餘杭縣署謁汪旭初知事汪君蘇人爲汪公使榮寶之弟章太炎高足也文學至優出其近作詩讀之而締交焉初八日晴余等四人雇定長途轎四乘挑夫三人從者一人共十六人於上午九時由餘杭進發依苕溪行三十里至青

山舖已入臨安縣境經天目山下又三十里至晚間六時半
抵化龍舖同興飯店住宿自餘杭而上山勢已綿延不斷其
旁水聲潺潺然皆自高而下從肩輿中聽之令人心氣愉快
然村市則至爲穢惡而是夜所住之同興飯店實不可一朝
居是夜忽大雨竟夕臥榻皆溼夜枕得詩一絕云野店寒衾
屋漏雄胸中黃嶽夢先通直疑天目東來勢一夜山泉盡化
龍

初九日晨起見簷溜瀼瀼雨仍不止余至爲納悶頗致悔意
繼思此時遇雨則遊山時定可得晴意又一晷遂發披雨衣
登肩輿於大雨中觀山澗奔流暴瀉其聲如雷行二十里至

藻溪午餐時已入於潛縣境自昨日啟行以後沿途所經市集不下八九處當以此處爲稍大亦稍清潔堪爲住宿之地惜昨夜未及抵此耳餐後復行雨勢漸止溪聲未稀溼翠滿山鳥語如弄此時之樂誠覺難遇又五十里抵蘆嶺關爲於潛昌化二邑分界處又十里抵昌化縣治時天已晴能步行街市矣縣無城而有堡街市亦寥落已甚余購得昌化石數枚以作經過此地之紀念而石則未佳也餘杭至此百四五十里間地勢愈行愈高澗水東奔亦愈清愈急記黃仲則詩有一灘復一灘一灘高十丈三百六十灘新安在天上之句此爲由錢塘而上遵水路行而言也今我由陸路行見山澗

水勢奔流亦作此觀乃覺此詩之妙我往新安眞我行天上
矣是夜住旅館中食宿較優

初十日晴由昌化行過大石橋數處曰千里橋曰白牛橋曰
太平橋二十里至手拏司渡溪過長木橋一所經畫眉三跳
嶺溪山交映陰翳可愛又喜其名之佳也爲賦一詩云入林
此處足幽棲萬壑叢篁俯碧溪曲徑陰深山木合畫眉嶺上
畫眉啼過嶺後喚渡渡過一溪行二十里至頰口在鳳凰嶺
左近又五里至橫溪橋亦大石橋也今日肩輿所經山氣愈
佳溪流愈大水皆西行過車盤嶺腳在祝川之東十五里抵
唇溪雖有荒肆數家實無稍可之處堪以止宿又無稍可之

食可以充飢不得已姑擇一家卽鋪白板於門內權爲止宿之處命煮麤飯松岑出攜來罐貯品食之是夜月色甚皎偕松岑耕餘走數十步外市盡處同立石橋俯視溪流淙淙有聲仰觀萬山當前重巒疊嶂月明半照冷風蕭然飄衣袂異聲起足畔令人魄動魂悸當此之時幾疑此境不類人世成詩一律云巉巖峻峭千尋丈破肆荒涼四五家月色當天山更靜灘聲到枕夜逾譁攫人高樹蹲奇鬼嚙草微吟疑怪蛇亦是平生未曾有夢魂應爲動杙枿皆紀實也今日計得詩五章不盡錄於此

十一日晴行二十里至昱嶺爲浙皖兩省交界之處故又名

界山山上有關爲昱嶺關荒矣出昱嶺關後山尤高樹尤大水又東流十里至老竹嶺腳越而過已甚高峻又十里至三羊坑連越嶺三山間之水漸緩漸小漸不如經過各處之清又二十里至杞梓里暫憩見有王姓者方新建築堅實宏敞詢其所費則甚廉蓋木石梁階皆取之於山不事遠求耳又三十里至鄭坑店住宿之處雖未得整潔喜其樓居尙新差堪安臥耳

十二日晴早發行二十里至大阜有吾蘇潘文勤家宗祠規模甚大潘氏原籍皖故建祠在此經大阜過大石橋一又二十五里至稠木嶺有大香樟一株陰可蔽野大逾十抱殆數

千年物也此間諸山大樹甚多不勝紀而此樹尤爲出衆云又十里午刻抵徽州府城自杭而上六日中行四百七八十里一路山脈連續無相間斷至此間始略告一段落黃山三十六峰距此尙有百餘里而遙然試立橋上望之見有山巍然高插雲表者卽是也卽由東門入城至迎賓旅館憩息中餐約二小時出至胡開文墨肆購墨數錠遂復乘肩輿出西門行十五里至西鄉湖田汪君謙甫家汪君爲歙西富室蘇州亦有商業因與松岑相識此次黃山之遊汪君曾與松岑約主其家又爲宋君景澂之親戚余亦隨之往謙甫有堂兄字贊勳皆一見如舊情意極爲優渥汪氏另有新屋一所初

落成名曰半園專讓余等居之是夜遂與松岑景澂耕餘諸君及錫光同下榻焉

十三日小雨擬休息一天並爲一切遊山之預備上午同人走謁謙甫之尊人潤生先生尙能健步優接賓客可感也旣退汪君正臣復導余等參觀汪氏小學聽學生習爲演講殊覺興會盎然汪君並爲余等同攝一影以表歡迎之意出仍至半園寫楹聯數事宋君景澂邀其友鮑倬雲君來鮑君係曾遊黃山者出遊詩一卷見示復和余詩一首是夜謙甫設盛席招飲在座者皆歙人黃山爲几席間物然遍詢之大抵無一人曾往者可知此山之遊正自不易耳

十四日晴是日由汪氏代雇肩輿四乘挑夫二人於上午十時自湖田啟行經潛口有楊明經範九與宋君景澂素識遂并邀余等小憩其家以麪相餉其壁上懸有張晉公所爲其母太夫人壽序其母年已八十餘矣猶康健也潛口市在紫霞山麓過市卽緣山行經佛子嶺又名雲嶺過嶺後已入黃山源經楊干過容成橋遂至容溪容成臺在焉過容溪後肩輿沿山傍溪大抵皆行深林密箐中垂枝刷輿頂約十餘里經長潭龍王亭渡石橋而至洽舍止蔣君致仁家謙甫所介紹也洽舍當萬山之中環以長溪風景絕佳主人亦有老母殷勤置饌令人感不絕於心晚間與松岑耕餘同步灘上余

跣足入水水底石磊磊而流急不敢多涉然意甚愉快是夜月明如白晝照山谷間深宵對此又覺別一世界遂得詩一首錄於此穿林多窄徑憩息萬山中與世真成隔尋源那得通峰高能受月溪響似聞風忍冷深宵立前頭雲氣蒙

十五日晴晨由洽舍而上肩輿皆從山罅入往往下臨深灘旁依危嶺驢駝物膨脹其左右從對面來則須貼肩輿於山壁乃可讓而過適驢一羣至當途狹處輿隨貼於壁猶不容驢迎而上與輿相觸輿倒退輿人仆於地余躍出乃免過楊村遇一溪橋斷不能行則肩輿皆涉水而過幸輿夫健步水沒膝得未傾經山口胡村金竹坑度石碁金竹兩嶺陰翳蔽

虧鳴聲在上幽勝之趣殆不可言過芳村後始於山隙處露
黃山一角矗立於亂峰重疊之外我志在黃山乃行之八日
方於歙之城外始一望見後三日距黃山愈近矣反不得見
今雖見之而路轉峰迴忽又不見嗚呼何其難也落日銜山
時抵湯口鎮鎮距黃山之紫雲庵不過四五里耳而仍不見
黃山今日自洽舍至此已行六十餘里輿人力痛不肯再行
余等急於入山因出輿步行纔二三里已夜色微茫不能辨
物松岑耕餘等皆前去惟余與景徵二人策杖上山汗且喘
疾行而進至紫雲峰麓下臨青龍潭潭下皆巨石有如鼉者
有如鼉者有如象如牛者千狀百態不一而足上流卽爲白

龍潭怒瀑從高處直下其聲隆隆震動山谷前及兩旁樹木蔽天路爲之絕正驚駭間聞右山密林中有物作怪響心疑虎聲毛骨爲悚忽過跨潭一橋爲小補橋當瀑奔最甚處不敢過繼視舍此別無他路乃穩步過之復曲折行數百武有籠鐙迎而至者則松岑等已抵紫雲庵庵中知余等將至故遣人來爲導引耳旣抵庵餓且憊飲茶啖飯後出門外於微雲明月之下聽瀑片時無異夢寐庵中一宿但覺枕畔皆瀑聲也

十六日晴晨起卽步行出茅篷茅篷者紫雲庵之舊名今雖頓易棟宇而門首猶大書黃山第一茅篷六字土人仍以茅

蓬稱之循昨夜原路下抵小補橋側右行不數武窪山腹爲池有亭翼然覆於其上者湯池也池作半圓形長丈餘其下細石皆成丹砂溫泉從砂中出縷縷如濺珠池壁石罅中更流出冷泉一道以適均其溫涼之度眞天造地設之浴所也至此欣然遂解衣而入覺泉水甚厚氣休休不能舉乃扶兩手於石壁用力按之始得履其底然一不慎則幾全身浮而起其池之中心深處水可及胸淺處及臍而止余入浴止能及臍不能及胸則氣不勝耳而吾獨怪自黃帝以來卽有此泉乃至於今其水不涸人之浴於其中者不知其幾何也而精極無點污溫暖無間冬夏雖神仙之說不必盡信而卽此